



Damondas da baghegiar

Nr. 92/2023

Datum da publicaziun: 09-06-2023

Patrun: Keller Thomas e Doris, 4051 Basel

Liug e parcella: Sumvitg-Via Sogn Benedetg; 996

Object: nova bargia

Il profils ein tschentai ed ils plans da construcziun ein deponi tier la canzlia communal. L'investa publica cuozza 20 dis dapi il datum da publicaziun.

Eventualas protestas encunter sura damonda da baghegiar ein d'inoltrar alla cumissiun da baghegiar Sumvitg enteifer 20 dis dapi il datum da publicaziun.

Eventualas protestas encunter sura damonda da baghegiar ein d'inoltrar alla cumissiun da baghegiar Sumvitg enteifer 20 dis dapi il datum da publicaziun.

Sumvitg, 09-06-2023

Cumissiun da baghegiar

Votaziuns federalas dils 18-06-2023 mira pagina 3 da quest FUS

L'urna ei aviarta (en canzlia communal)

gievga e venderdis mintgamai duront las uras da spurtegl
dumengia, ils 18-06-2023, dallas 10.00 – 11.00 uras

Sonda e dumengia, ils 17 e 18 da zercladur 2023 mintgamai avon il survetsch divin en las fracziuns.

Il cedels da votar ein vegni distribui. Tgi ch'ei aunc buc en possess da tals ei supplicaus da s'annunziar tier l'administraziun communal.

Adatg!

Il certificat da legitimaziun ei adina da presentar. Tier votaziuns cun posta ei il certificat da legitimaziun da suttascriver. Senza suttascripziun ei la votaziun nunvaleivla. Nus supplichein da consultar las informaziuns che Vus anfleis sin la cuviarta e sil certificat pil dretg da votar.

Sumvitg, 09-06-2023

Biro electoral

Communicaziun dalla suprastonza communal

Vicepresident communal per 2023/2024

La suprastonza communal ha elegiu tenor art. 39 dalla constituziun communal en sia seduta dils 05-06-2023 gerau Gion Battesta Huonder sco vicepresident communal pigl onn da gestiun 2023/2024.

Sumvitg, 09-06-2023

Suprastonza communal

Radunonza da vischnaunca

La proxima radunonza da vischnaunca ha liug gievgia, ils 15 da zercladur 2023 allas 20.00 uras a Cumpadials.

Gliesta da tractandas

1. Avertura e beinvegni
2. Elecziun da 2 dumbravuschs
3. Protocol dalla davosa radunonza communal dils 15-12-2022
4. Rendaquen 2022
5. Rapport dils revisurs ed approvaziun dil quen annual 2022
6. Tractaziun ed approvaziun dil project da lavineras per igl uaul da Puzastg e concessiun dil credit brut da 650'000 francs
7. Orientaziuns
8. Varia

Sumvitg, 09-06-2023

Suprastonza communal

Informaziun davart il persunal communal

Sin fundament dallas annunzias inoltradas per la piazza tier igl uffeci forestal da bostger / maschinist publicada l'entschatta matg 2023 ha la suprastonza communal elegiu en sia seduta dils 05-06-2023 Remo Lechmann da Rabius. Remo Lechmann ei actualmein engaschaus tier la vischnaunca per il menaschi tecnic. La suprastonza communal gratulescha al Remo sin sia elecziun e giavischa ad el bia satisfacziun en sia nova funcziun. La piazza tier il menaschi tecnic che vegn libra entras la midada da Remo Lechmann tier igl uffeci forestal ei publicada sin la pagina d'internet dalla vischnaunca da Sumvitg. Entochen ils 30-06-2023 han interessentas ed interessents la pusseivladad da s'annunziar per quella piazza. Informaziuns detagliadas dalla piazza ein disponibilas sin www.sumvitg.ch.

Sumvitg, 09-06-2023

Suprastonza communal

Invitaziun a workshop «Avegnir vischnaunca Sumvitg»

Il mund semida e las pretensiuns enviers la vischnaunca semidan cuntinuadamein. Ord quei motiv sto la vischnaunca da temps a temps s'occupar cun damondas fundamentalas. Ensemen cun la populaziun vul la suprastonza communal definir finamiras e la via per ils proxims onns. Ord quei motiv envidein nus las convischinas ed ils convischins cordialmein da separticipar al workshop «Avegnir vischnaunca Sumvitg».

datum:	sonda, ils 26-08-2023
uras:	08.30 tochen 13.00 uras workshop; silsunter offerescha la vischnaunca in pign gentar
liug:	casa da scola Rabius
ulteriuur:	sin giavisch vegn mess a disposiziun ina survegionza d'affons durant il workshop

Il workshop vegn accumpignaus da Tino Zanetti ed Arno Felix dil biro Curia SA. La finamira ei ch'ils participonts san elaborar posiziuns ed ideas per differentas tematicas. Persuenter vegn formau gruppas da lavur tier las sutnumnadas tematicas.

gruppa 1:	viver a Sumvitg (<i>purschidas per indigens, promoziun dalla construcziun da habitaziuns, politica da famiglias, mobilitad eav.</i>)
gruppa 2:	veta dil vitg - convivenza (<i>vegliadetgna, giuventetgna, scola, demografia, integraziun, sanadad, loghens da sentupada eav.</i>)

gruppa 3:	turissem e temps liber (<i>svilup turistic, veta dallas uniuns, promoziun/posiziun da cultura e sport, tradiziuns eav.</i>)
gruppa 4:	vischnaunca digitala (<i>transformaziun digitala dalla vischnaunca e dall'administraziun communal, coworking eav.</i>)
gruppa 5:	collaboraziun locala e regionala (<i>fuormas da collaboraziun existentas e futuras, consorzis, collaboraziuns dallas fracziuns, ideas per svilup regional eav.</i>)
gruppa 6:	brat cun populaziun e possessurs da secundas habitaziuns (<i>brat d'uffecis/administraziun communal cun populaziun, pusseivladads da participaziun, attractivitat dalla vischnaunca sco patron e per engaschi per ina autoritad/uffeci, comunicaziun, integraziun da possessurs da secundas habitaziuns en la veta da vischnaunca eav.</i>)
gruppa 7:	svilup economic/agricol (<i>commerci - pusseivladads da svilup, agricultura ed ecologia, diversificaziun dallas entradas communalas, energia eav.</i>)

Per saver preparar il workshop ei in'annunzia necessaria. Nus supplichein tuttas personas che han interess da prender part al workshop da returnar il formular d'annunzia ch'ei vegnius tarmess per posta entochen ils **26-06-2023**. Sin il formular d'annunzia saveis Vus indicar Vossa tematica preferida. Nus supplichein plinavon d'indicar la tematica che ha per Vus secunda prioritad. Sin fundament dallas annunzias vegnan ils accumpignaders dil project a formar gruppas da lavur ed en quei connex empruar da risguardar las tematicas preferidas annunziadas.

La suprastonza communal selegra sin stedia participaziun e sin bunas discussiuns. Lein comunablamein formar igl avegnir dalla vischnaunca da Sumvitg.

Sumvitg, 09-06-2023

Suprastonza communal

Avis dall'administraziun communal

Sur Sontgilcrest resta l'administraziun communal serrada naven da **mesjamna, ils 7 da zercladur 2023 allas 17.00 uras entochen gliendisdis, ils 12 da zercladur 2023 allas 08.00 uras.**

Bien engraziament per Vossa capientscha.

Sumvitg, 09-06-2023

Administraziun communal

Serrada via Crap Ner

Muort in tagl da lenna ei la via da Crap Ner serrada naven dil careun da Salvaplauna Su. La via resta serrada prevententamein entochen ils 23 da zercladur. Era las fin d'jamnas resta la via serrada. Nus engraziein per Vossa capientscha.

Ulteriuras informaziuns survegnis Vus directamein da nies selvicultur Beat Cadruvi (tel. 079 681 19 67).

Sumvitg, 09-06-2023

Uffeci forestal Sumvitg

Dismessa da neofitas

Las flurs san vegnir dismissas ad Igniu tier il baghetg economic en ina mulda separata. Il plaz da rimnada ei aviarts mintga di. Nus supplichein Vus da transportar las neofitas separau dil curdem verd. Sin la pagina d'internet www.infoflora.ch anfleis Vus ulteriuras informaziuns sur dallas neofitas invasivas.

Sumvitg, 09-06-2023

Uffeci forestal Sumvitg

Lavurs vid Via Laus (Caplazi tochen sbuccada Via Puzzastg)

Muort la sanaziun dalla Via Laus naven da Caplazi entochen la sbuccada dalla Via Puzzastg resta la via serrada entochen ils 28-07-2023. Per ils automobilists vegn mess a disposiziun durant il temps da construcziun in parcadi a Laus. Per saver carrar sill'alp Laus per motivs dall'agricultura ni specials astga durant il temps da construcziun vegnir fatg diever dalla Via Puzzastg. Per damondas stat Alexander Deplazes dil biro d'inschignier Deplazes (tel. 081 943 25 60) a disposiziun.

Sumvitg, 09-06-2023

Departament traffic

Informaziun dalla Societad cooperativa da consum Surrein-Rabius

Sut il motto "acziun pil vitg" eis ei vegniu menau atras la fin d'jamna da Tschuncheismas ellas stizuns dils vitgs Rabius e Surrein ina concorrenza da cedels da cassa. Ils organisaturs han giu grond plascher da surdar ils canasters empleni cun victualias a Catrina e Luis Deplazes da Surrein ed a Lisa ed Erwin Bearth da Rabius.

Nus giavischein in bien appetit e grond plascher vidlunder.

Sumvitg, 09-06-2023

Societad cooperativa da consum Surrein-Rabius

Sumvitg Turissem

Nova purschida da Sumvitg Turissem e Trun Turissem

Las duas uniuns turisticas han en collaboraziun ediu ina tura panoramica da lur vischnauncas. Naven dad immediat ein las turas online. Prendei investa e gudi la tura virtuala tras nies intschess. Link: <https://sumvitg-trun.panotour.ch>

Per damondas stein nus bugen a disposiziun info@sumvitg-turissem.ch

Sumvitg, 09-06-2023

Sumvitg Turissem

Uniun samaritana Sumvitg-Trun

La proxima **acziun da spender saung ha liug: gliendisdis, ils 19 da zercladur 2023, dallas 18.30–20.30** en la sala dil center communal a Trun. Sin bien seveser, cun quei spender saung spendra veta!

Nies proxim exercezi ha liug **mardis, ils 13 da zercladur allas 20.00** a Surrein. Nus serimnein avon la casa da scola. Nies tema ei accidents sin via e vegn menaus atras giadora. Bugen beneventein nus tut tgi che ha interess, era buc commembers/ras e selegrein sin in bien exercezi.

Apparat d'udida

Gliendisdis, ils 12 da zercladur 2023 saveis Vus schar schubergiar e rugalar Vies aparat d'udida:

9.15–10.30 en Casa sogn Martin a Trun

11.00–11.45 en Casa sogn Giusep a Cumpadials

13.15–14.30 el PUNTREIS, Center da sanadad a Mustér

Dunna Giger dalla firma Amplifon AG e signur Gfeller dalla firma Jäggi Optik & Hörberatung AG surprendan comunablamein quei survetsch gratuit per tuts interessents. Ei drova negina annunzia.